

Sinun oikeus käyttää kansalisia minuriteettikieliä

Jos sie kuulut johonki kansalisista minuriteetistä niin sulla on oikeus käyttää omaa kieltä yhteyksissä viranomhaisitten kans. Tässä saat tietää mikkä kielelliset oikeudet sulla on ja mitä saatat vaatia sinun kunnalta ja muilta viranomhaisilta.

Janyaarin ensimmäisenä päivänä 2010 tuli uusi laki kansalisista minuriteetistä ja minuriteettikielistä. Kansalliset minuriteetit on juutalaiset, roomit, saamelaiset, ruottinsuomalaiset ja torniolaaksolaiset. Kansalliset minuriteettikieliset on jiddisch, romani (romani chib), saamen kieli, suomi ja meänkieli.

Kaikkia kansalisia minuriteettikieliä pittää suojata ja eesauttaa

Laki sannoo ette kansalisia minuriteettikieliä pittää suojata ja eesauttaa. Sillä, joka kuuluu kansalisheen minuriteettiin, pittää olla oikeus oppia, kehittää ja käyttää omaa minuriteettikieltä. Viranomhaisitten pittää kuunnella kansalisia minuriteettiä ja ottaa huomioon heän tarpeet. Viranomhaisilla on velvolisuus informeerata sinua sinun oikeuksista, riippumatta siitä mitä kansalista minuriteettikieltä sie puhut ja siitä missä sie asut Ruottissa.

Erityisen vahvat oikeudet suomele, meänkielele ja saamen kielele

Erityisen vahvat oikeudet on sillä joka puhuu suomea, meänkieltä eli saamen kieltä ja assuu jonku hallintoalueen kunnassa. Tämän sivun alaosassa näet jos sinun kunta kuuluu johonki hallintoalueeseen.

Sulla, joka asut hallintoaluekunnassa, on oikeus komyniseerata viranomhaisitten kans omala kielelä. Sinun pittää saa vastaus suullisesti eli kirjoitettuna samala kielelä. Sie saatat vaatia lasten- eli vanhoitteenhoitoa kokonnaans eli osittain suomeksi, meänkielele eli saamen kielele. Jos sie asut Kirunan, Jellivaaran, Arjeplogin, Jokkmokin, Haaparannan, Pajalan eli Mataringin kunnassa, sulla on oikeus käyttää minuriteettikieltä yhteyksissä tuomioistuihmeen.

Sinun, joka asut kunnassa joka ei kuulu mihinkhään hallintoalueeseen, pittää kans saattaa olla yhteyksissä viranomhaisiin ja saa vanhoitteenhoitoa suomeksi, meänkielele eli saamen kielele, jos on olemassa henkilökunta joka hallitsee kielen. Viranomhaisitten pitäs huolehtia siitä, ette on kielitaitosta pärsunaalia ko sitä tarttee.

Riippumatta siitä missä sie asut, sinun häätty aina saattaa kirjottaa suomeksi, meänkielele ja saamen kielele Valtiöpäivitten asiamiehile, Jytsiitsiekanslerille, Siukkakassale, Verolaitokselle ja Tiskrimineerinkiasiamiehele.

Tänne saatat kääntyä

Jos sie piät ette sinun kunta eli muut viranomhaiset ei nouata lakia, sie saatat ottaa yhteyen Stockholmin läänin Lääninhallituksen eli Saamekäräjitten kans, jotka pitävät valvoa ette lakia nouatethaan. Saamekäräjillä oon vastuu saamen kielestä ja Lääninhallituksela Stockholmin läänissä oon vastuu muista kielistä.

[Minuriteetikysymyksitten osasto Lääninhallituksessa Stockholmin läänissä](#)

Tel 08 – 785 40 00

[Sametinget](#)

Tel 0980 – 780 30

Täältä saatat lukea enämpi

Täältä saat enämpi tietoja sinun oikeuksista:

- [Faktaplaavi kansalisitten minuriteetitten oikeuksista](#)
- [Internettipaikka kansalisille minuriteetile](#) (ruottiksi)
- [Kansalisista minuriteetistä Skolverketin kotisivula Tema modersmål](#) (ruottiksi)
- [Kansalisista minuriteetistä Språkrådetin kotisivula](#) (ruottiksi)
- [Kansalisista minuriteetti- ja minuriteetikielilaista](#)
- [Tuote Skolverketistä kansalisitten minuriteetitten oikeuet koulussa](#) (ruottiksi)

Suomen, meänkielen ja saamen kielen hallintoalueet

Tästä näet mikkä kunnat kuuluvat eri hallintoalueishiin. Muut kunnat saattavat hakea hallintoalueesheen kuulumista.

Suomen kielen hallintoalue

Borlänge, Borås, Botkyrka, Degerfors, Enköping, Eskilstuna, Fagersta, Finspång, Gävle, Göteborg, Haaparanta, Hallstahammar, Haninge, Hofors, Huddinge, Håbo, Hällefors, Jellivaara, Kainus, Karlskoga, Kiruna, Köping, Lindesberg, Ludvika, Luulaja, Malmö, Mariestad, Matarinki, Motala, Norrköping, Norrtälje, Nykvarn, Oxelösund, Pajala, Sandviken, Sigtuna, Skinnskatteberg, Skövde, Smedjebacken, Solna, Stockholmi, Sundbyberg, Sundsvall, Surahammar, Södertälje, Tierp, Trelleborg, Trollhättan, Trosa, Uddevalla, Uumaja, Upplands-Bro, Upplands Väsby, Uppsala, Västerås, Älvkarleby, Örebro, Österåker ja Östhammar.

Saamen kielen hallintoalue

Arjeplog, Arvidsjaur, Berg, Dorotea, Härjedalen, Jellivaara, Jokkmokki, Kiruna, Krokomb, Lycksele, Malå, Sorsele, Storuman, Strömsund, Uumaja, Vilhelmina, Åre, Älvdalen ja Östersund.

Meänkielen hallintoalue

Haaparanta, Jellivaara, Kainus, Kieruna, Matarinki ja Pajala.